

Goibekokale

ELGETA / Barikua / 2006ko urtarrilaren 27a / 254. zenbakia

KOORDINATZAILEA: Irati Agirreazaldegia • Barrenkalea 33 BERGARA 20570 • Tel.: 943 25 05 02 • Faxa: 943 25 05 13 • Posta elektronikoa: goibekokale@goiena.com • Lege gordailua: SS475/95

Ozkarbik erretiratuen elkarteari buruzko hitzarmena egin nahi du Udalarekin

IRATI AGIRREAZALDEGI

Urteko batzarra izan zuten joan zen egunean Ozkarbi elkartean. Urteko kontuen berri emateaz gain, beste zenbait gai izan ziren mahai gainean. Presidente berria ere aukeratu zuten: Gaizka Bolinaga. Elkartearen inguruko kontuak azaldu dizkigu.

Herrian bazkide gehien dituen elkarte da Ozkarbi; 300 bazkide inguru. Horietaz gain, 170 erretiratutako ere bertan dute egoitza.

Urteko batzarra egin dute, eta zenbait gai garrantzitsu izan zituzten hizpide.

Baserritarrekin eraikina erabiltzen jarraitzeko egin duten tratua berri eman zuten lehenengo. Ondoren, barne araudiko aldaketak jakinarazi zituzten.

Batzarreko beste gai bat kuoten igoera izan zen: "Azken urteotan galerak izan dira elkartean eta mantentze-lanak ere egin ditugu; beraz, kuotak igotzea erabaki dugu: 36 eurotik 60 eurora. Kuotekin gastu finkoei aurre egitea da asmoa", esan digu Gaizka Bolinagak.



Ozkarbik 300 bazkide ditu; baina herriko 170 erretiratutako ere bertara joateko aukera daukate.

ERRETIRATUEN ELKARTEA

Batzarrean bazkideei jakinarazi zieten elkarteak hitzarmen bat egitea proposatu diola Udalari.

Hitzarmenaren bidez, idatziz jaso nahi dira Udalaren, erretiratuen elkartearen eta Ozkarbiren arteko harremanei dagozkien bal-

dintzak. "Erretiratuek Ozkarbin dute egoitza eta Udalarari eskatu diogu, besteak beste, elkartearen gastuen zati bat ordaintzea", dio

Udalarekiko hitzarmena Aste Santurako sinatuta egotea nahi du Ozkarbik

Bolinagak. Aste Santurako sinatuta nahi dute hitzarmena.

EGUNKARIAK

Ozkarbin zein egunkari hartu erabakitzeko ere izan zen eztabaidarik. "Bazkide batek proposatu zuen *Noticias de Gipuzkoa* erostea, eta luze berba egin ondoren, erabaki zen nahikoa zela kau egunkari erostea eta eztabaidatu ondoren, bozketa bidez erabaki genuen aurrerantzean *Berria*, *Diario Vasco*, *Noticias de Gipuzkoa* eta *Gara* hartzea".

Tabakoaren lege berriari buruz, orain arte bezala elkartearen erretzen jarraitzea adostu zuten gauzak argi ez daudelako.

Zuzendaritza batzorde berria otsailaren hasieran elkarteko da aurtengo lan jarduna zehazteko.

UDALA

Aurrekontuen gaineko osoko bilkura atzeratu egingo dute proposamena moldatzeko

I.A.

Udal aurrekontuen gaineko osoko bilkura egitekoak ziren urtarrilaren 31n, baina Udaltik jakinarazi digutenez batzarra atzeratu egingo dute. EAJ-EAK egindako proposamenean zenbait aldaketa egingo dituzte, eta horretarako tarte luzeagoa behar dute.

Udala ia zuzen batzuk saltzekoak zen, baina salmenta ez dute aurtengo urte hasierara arte egin. Hori dela eta, 2006ko aurrekontu

proposamenean azken uneko aldaketak egin behar dituzte. Patxi Basaurik esan digunez, "aldaketa horiek ez dute aparteko eraginik izango aurrez egindako proposamenean. Baliteke kopuru batzuk moldatzea, baina mugimenduak oso txikiak izango dira".

ARALARRENTZAT EZ DA ERREALA

Aralarrek prentsa ohar baten bidez esan digu "aurkeztutakoa ez zela errealia. EAJ-EAK zabaldu duen proposamena aldatu egin du azken momentuan. 2005eko

aurrekontua superabitarekin likidatzea aurreikusitako arren, gestioan izandako akatsen ondorioz defizitarekin itxiko da".

Proposamena erreala ez dela esateko bi arrazoi eman dituzte Aralarrek: "Diru sarrera aurreikuspena ez zen errealia; defizita egongo zela seguru geunden, eta denborak arrazoia eman digu. Bestetik, EAJ-EAK aurkeztu zuen 5.443.502 euroko aurrekontua eta erabili dira 3.400.747 euro. Hori ez dio azaldu EAJ-EAK herriari. Ezta zeintzuk diren egin ez diren inbertsioak".

PROPOSAMEN BERRIA

Herriarrei jakinarazi diete "Aralar ez dagoela prest edozer onartzeko". Hala ere, EAJ-EARekin aurrekontuak adostu nahi dituzte eta diote "seriotasuna badago eta gauzak argi eta garbi azaltzen badira posible dela".

Azken orduko aldaketa hauek direla eta euren proposamena "hankaz gora" geratu dela diote, baina "prest gaude aurrekontu proposamen berriari behar beste buelta emateko eta ia Elgetako bi alderdi nagusienok bat egiterik dugun".

LABUR

Bular minbiziaren prebentzioari buruzko hitzaldia

Otsailaren 1ean, eguaztena, hitzaldia izango da 18:00etan udaletxeko osoko bilkuren aretoan. Bularreko minbiziaren prebentzioaren gainean jardungo du Donostia-ko Onkologia Institutuko sendagile Lourdes Aritziturrik. Bularreko eta Ginekologiako Minbiziaren dute Emakumeen Katxalin Elkarteak eta Elgetako Udalak elkarlanean antolatutako hitzaldia da. Interesa dutenei eta bereziki herriko emakumeei egin nahi diete gonbidapena hitzaldira joateko.

HEZKUNTZA

Izaskun Larrea: "Haurreskolara joan nahi duen umerik ez da kalean geratuko"


Udaleko Hezkuntza batzordeko Izaskun Larreak hainbat azalpen eman ditu haurreskolaren gainean. Besteak beste, esan digu 2007-08 ikasturtetik aurrera Torrealdean egongo dela haurreskola eta bitartean eskaria egiten duten ume guztiek izango dutela lekua.

Haurreskolari buruz azkenaldian agertu diren berriak direla eta hainbat azalpen eman ditu Izaskun Larrea Hezkuntza batzordeko buruak: "Gai honi buruz oso argi utzi nahi dut Elgetako ume guztiak haurreskolara joateko aukera inoiz ez dela zalantzan egon, eta hori horrela izan dadin iazko azarotik hona ni arduratu naizela pertsonalki bai Haurreskolak partzuergoko gerentearekin eta herriko haurreskolako arduradunekin egon eta egoera argitzen; baita agertu diren gurasoei azalpenak ematen ere".

Gaineratu du eskaria egiten duten umeen kopurua handia izan arren, ez dela arazorik egongo. "Teorian Elgetako haurreskolak hamar umerendako tokia du, baina datorren ikasturtean ume kopuru handiagoa izango balitz, adostuta dugu nahi duten ume guztiak onartuko direla", esan digu Izaskunek.

TORREALDERA

Udaleko Hezkuntza batzordetik esan digute euren asmoa dela haurreskola 2007-2008 ikasturtetik aurrera Torrealdean egotea. Izaskun Larrearen hitzetan, "haurreskola Herriko Eskolan jartzea behin-behineko erabakia izan zen, Torrealdeko etxeak bukatu artekoa. Gure asmoa 2007-08 ikasturtearen hasierarako haurreskola berria gertu izatea da. Hala ere, lanegatik edo atzerapenen bat gertatuz gero, hitzartuta daukagu Herriko Eskolan segitzea Torrealdekoa bukatu bitartean".



Hezkuntza batzordeko burua da Izaskun Larrea zinegotzia.

LABUR

San Blas eta Santa Ageda ospakizunak otsailaren 3an

Herri Eskolako ikasleek otsailaren 3an ospatuko dituzte San Blas eta Santa Ageda egunak. Barikuan da San Blas eguna, eta goizez opilak egingo dituzte eskolan. Santa Ageda eguna otsailaren 5ean bada ere, haren omenez barikua arratsaldean irtengo dira kantura eskolako umeak. 14:30ean abiatu eta herriko kaleetan egingo dute eskea. Batutako dirua Inauterietan askaria egiteko erabiliko dute.

ZUZENKETA

Joan zen barikuan, udal batzordeen gainean kaleratutako albistean esan genizuen Beatriz Gallastegik hartuko duela Euskara eta Gazteria azpi batzordeen ardura. Gaizkiulertu baten ondorioz abizena oker jarri genuen, eta Gallastegi beharrean Beatriz Basauri behar zuen. Barka okerrak.

GERRA ZIBILA

Oroigarria Elgetan biktimen omenez

Espainiako gerraren 70. urtemuga dela eta, ekitaldi sorta antolatu du Eusko Jaurlaritzak. Urtemuga baliatuz, "demokraziaren eta askatasunaren alde borrokatu eta diktadura frankistaren jazarraldia, erbestea eta heriotza jasan zuten guztiei omenaldia egin nahi diegu", jakinarazi du Eusko Jaurlaritzako bozeramaile Miren Azkaratek.

ELGETAN MONOLITOA

Hasteko, otsailean Nestor Basterrearen eskultura bat ipiniko dute Bilbon, frankismo garaiko biktimak goratzeko.

Bestalde, gerrak bereziki astindutako herrietan, Turtziozen eta Gernikan esaterako, gobernu bilerak egingo ditu Jaurlaritzak urtean zehar.

Elgetan ere Intxorta gudu lekua izan zenez, oroigarriren bat ipintzekoak direla jakinarazi dute. Ekitaldia non eta noiz egingo duten zehaztu gabe dago, baina baliteke egun oroitarria dagoen tokian, Asentzian, ipintzea.

Espainiako gerrak Euskadin izan zuen bilakaera ikertzeko lanak ere sustatuko ditu Jaurlaritzak. Lanok frankismo garaian desagertutako eta fusiutatutako lagunak identifikatzeko lanen osagarri izango dira.



Espainiako gerran hildakoen gorputzak aurkitu zituzten Intxortako magalean.

KULTURA

Zinema musikatua gaur eta antzerkia datorren barikuan

Gaur, barikua, zinema emanaldia izango da Espaloian 22:30ean. Baina ez da ohiko film emankizuna gaurkoa; zinema musikatua gertatu dute antolatzaileek. Bestalde, antzerki saioa dago iragarrita datorren barikurako: Yllana taldearen *Olimplaf*.

Buster Keaton eta Clyde Bruckmanek zuzendutako *The General* filma emango dute. Komedia kutsuko film hau Ipar Amerikako gerra zibilean kokatuta dago; eta treneko makinista batek bahituta dagoen neskalaguna berreskuratuko du bertan.

Film emanaldiaren berezitasuna, ordea, musika izango da; zuzeneko musika, hain zuzen ere. Medin Peiron pianojole kataluniarrek zuzenean joko du isats-pianoa, film mutua ikusgai den bitartean. Besteak beste, Eric Satieren *Gnosyenes* eta Beethovenen *Sonata apassionata* joko ditu Peironek.

Musika estetika berriengana zaletasuna erakutsi du eta bakarlarari moduan sormenari zuzendutako nazioarteko jaialdiaren parte hartu du.

Emanaldirako sarrerak bost euro balio du eta bazkideendako hiru euro.



Yllana taldeak keinu bidezko *Olimplaf* lana eskainiko du hurrengo barikuan.

ANTZERKIA

Bestalde, datorren barikuan, otsailaren 3an, Yllana taldeak *Olimplaf* antzezlanak eskainiko du 22:30ean Espaloian.

Olinpiada berezi batzuetan parte hartuko dute hiru atletak. Podiumean ahalik eta goren iristeko hainbat trikimailu erabili-

ko dituzte; eta ikusleak ere euren amarruen konplize bihurtuko dituzte.

Adin guztietarako egokia den ikuskizunean keinuen bidez ikusleak gozaraziko dituzte aktoreek.

Sarrerak jadanik salgai daude 12 eurotan, eta bazkideendako hamar euroren truke.